

Xujun xi majo xi catsihindu San Pablo cojo Timoteo

1 Ngahan Pablo ne, apóstol tsëhë Cristu Jesús má ngahan ta, tsëhë xi cuatjin meje rë Nina. Vëhë xi catsingatju ná me, xi cuichjá cojo xuta ta sua naja me ngu cjuahñu ndajyihi, sa xi nihña tangun cjuatacun naja cojo Cristu Jesús. ²Ngaye Timoteo ne, tsihindu ri xujun vihi ta, tsëhë xi sacuaha quihndi ndaja naha ngaye. Nina Nahmi naja cojo Cristu Jesús Nai naja ne, catamayuma rë me ngaye, catisua ri me cjuandaja, cjuajeya.

Tisua me cjuaquixi tsëhë Nina

³Nixtin nixten, hora xi sahme oración naha ne, jercu veyanangë ri, hacuaha suá nacuechji rë Nina. Hacuaha sahme xa rë Nina cojo ngu cjuatacun tyjahi, sacuahatjin casahmi xutachanga naha. ⁴Vitsjen ná hacutjin cachjihnde, ngatsë rë xi cavëtju cëjë tsiji. Hacuaha jemu meje ná xi ndove tjengui ná, sehe ngahan ne, jemu ndaja cuma ná. ⁵Hacuaha vitsjen ná hacutjin xi jemu ndaja macjain ri cjuarë Nina, sacuaha tjin xi titjun camacjain rë chicuhun riji, chicuhun Loida, cojo na Eunice naa riji. Hane fëmangúcacun xi cojo ngaye ne, ha cuatjin ndaja macjain ri.

⁶Vëhë xi chjá cojo ri ta xi catiin cahndé xi cjuë cjuatacun xi casua ri Nina, hya xi cavétahantsa ri. ⁷Ta Nina ne, hacuiin casua naja me ngu cjuatacun xi ngayaan ne, cumacjintacun ta, casua naja me ngu cjuatacun xi sacú naja ngahñu, xi nihña hmu tacuun xingueen, hacuaha xi scaa naja cuetjoon yojo naja. ⁸Vëhë xi hacuiin nihñi savá, hya xi cuinoje cjuandajyihi tsëhë Nai naja. Hacuaha hacuiin nihñi savá ngatsë naha ngahan xi tejñaya ndavaya, ngatsë rë xi chjá cjuarë me. Hacuiin nihñi savá ta, nihñi ngahñu cojo yëjë ni cjuañihi xi cuátji cuma, ngatsë rë cjuandajyihi xi tinoje. Cuatjin nihñi hacutjin chutaha ngahñu xi tisua ri Nina. ⁹Nina ne, cavaxëtje naja me hacuaha cavaxijin naja me, xi cuma tsëhë me ngayaan. Hacuiin ngatsë rë xi jemu ndaja canihña xi cuatjin casahmi me ta ngatsë rë xi cuatjin meje rë me, tsëhë xi jemu ndaja me. Hisca xi chaja sa cuejña ngasunhdë ne, ha catsingatahacacun Nina xi sua naja me cjuandaja rë me, ngayejen ni xi tsëhë Cristu Jesús ngayaan. ¹⁰Hane hya xi cafehe Cristu Jesús, me xi

vaxëtje naja ne, hya camachaya jain naja cjuandaja rë Nina jan. Hane Cristu jan ne, catsicjë me ngahñu rë cjuaveya, hacuaha casuacuenda naja me ta sua naja Nina ngu cjuahñu ndajyihi, xi tsajin nu tsajin nixtin cueyan nga. Vëhë cjuatacun xi vicuya naja cjuandajyihi rë me.

¹¹Nina ne, casua ná me xa xi suá cumachaya rë xuta hacuaha cuicuyá rë xuta cjuandajyihi rë me. ¹²Ngatsë rë xa vëhë ne, jemu cjín cjuañihi tivátju jima. Peru ma savaain ná, tsëhë xi ha hvë Cristu, hacuaha camangucácun cojo rë me. Hacuaha tjin ná cjuaquixi xi me vëhë ne, jyë me cojo cjuatacun rë me xi cuetjo ná me, hisca nixtin xi cuinduva nga me nguehe ngasunhndë.

¹³Nihñi sacuaha tjin cjuaquixi xi ha cachjá cojo ri. Hacuaha nguñajatacuin catamacjain ri Nina, hacuaha nihñi hmutacuin xinguin, tsëhë xi ngaye ne, ladu rë Cristu ngaye. ¹⁴Nihñicuende cjuaquixi xi casua ri Nina. Hane Hasen rë Nina xi tacun cahntsua xahasen naja ngayejen ni xi macjain naja me ne, Hasen vëhë xi sua ri ngahñu xi cuatjin nihñi.

¹⁵Ngaye ne ha hye xi ngayëjë ni xuta xi tsëhë ladu xi hmí rë Asia ne, casmicacun ná me. Ngajñi rë xuta xi cuacun jan ne, hinchajñi cha Figelo cojo cha Hermógenes. ¹⁶Peru cha Onesíforo ne, catamayuma rë Nina yëjë ni ndava cha ta, tsëhë xi jemu cjín ndiya xi casahmi cha cjuandaja xi cavisecoo ná cha. Hane cama savaain rë cha xi tejñaya ndavaya. ¹⁷Xi tu cafehe cha nguehe nandya Roma ne, cavetsihin

cavanguise cha ngahan, hisca xi casacu rë cha ngahan. ¹⁸Nai naja ne, catamayuma rë me cha, nixtin hya xi cuinduva nga me nguehe ngasunhndë. Ta ngaye ne, ha ndaja hye hacutjin xi jemu cavisecoo ná cha ngajan nandya Efeso.

Xuta xi ndaja sahmi me xa rë Cristu

2 Peru ngaye tsan ne, catisua ri Cristu Jesús cjuandaja rë me, xi cuma cuinechin nguñajatacuin. ²Jemu cjín xuta xi hacuaha caviseñuju me yëjë ni cjua xi cachjá cojo ri. Peru quihndë ne, meje rë xi ticoye rë ngujo cha cjuajan, cha xi tsejen xi mangutacuin cojo rë hacuaha chutaha cjuatacun rë, sehe cha xi cuacun jan ne, hacuaha cuicuya cha xuta xi yahnga.

³Ngaye ne, nihñi ngahñu xi scaa ri cojo yëjë ni cjuañihi xi cuátji cuma ngatsë rë Cristu Jesús, sacuaha tjin caa rë ngu sindadu xcun ngu si. ⁴Hane sindadu xi hinchajñi cha tsëhë xa xi yaha cha ne, cumaji tsinguissehenjñi cha tu mé ni xa ta, tjin rë cha xi sahmi cha hacutjin xi chuya rë me xi matitjun tsëhë cha. ⁵Hacuaha ngu cha xi cuisehen xcun ngu juegu xi ntsavë cha ne, sa xi chohotjin ntsavë cha ne, sacuiin rë cha cjuatjo, handasa tjun cha cuetju cha. ⁶Hacuaha cha xi sahmi xa nguijña ne, meje rë xi cha vëhë xi titjun satë rë cha tsëhë xitjë xi casahmi cha. ⁷Ndaja ningatehetacuin hacutjin cjuajan xi tichjá cojo ri. Sehe Nai naja ne, me vëhë sahmi me xi cuijnercui cjuavë.

⁸Ninguitsjin xi Jesucristu ne, cavascaya rë me ngajñi rë nima, hacuaha canduva tjë rë

me xutachanga naja David. Vêhë cjuandajyihî xi ngahan visiajme cojo xuta. ⁹Hane ngatsë rê xi cuatjin visiajme cjuandajyihî jan ne, vêhë xi choho tivátju jima. Hisca quitahahñu rê xuta ngahan nguehe ndavaya, sacuaha tjin rê ngu xuta tsehen xi yehe jyé rê. Peru cjuarê Nina ne, hacuiin quitahahñu. ¹⁰Vêhë xi ticaa ná ngayëjë ni cjuañihî xi tivátju jima, cojo sa xi yëjë ni xuta xi cavaxijin Nina ne, cuetjutje me ngatsë rê xi macjain rê me Cristu Jesús, hacuaha cuechu me xcun Nina ngajan cuiyuju me nu cjuî nu nduva.

¹¹Cjuar vihi ne jemu cjuaquixi: Sa xi ha macjain naja Cristu hya xi cueyan ne, hacuaha cuinechan quicun nga cojo rê me;

¹²sa xi ha cacaa naja ne, hacuaha cuisecoon rê me cuitexan. Sa xi ha canújan xi hyaan yo me ne, hacuaha ni tjin cuichja me ta hvíin me yo ngayaan.

¹³Handasa ngayaan ne, nihñacheen cjuar naja, peru me vêhë ne, hatuxa sahmi chihin me cjuar rê me ta, tsêhë xi hatuxa vindachaa in me.

Hacutjin xi Nina chuya rê me

¹⁴Ninguitsjin rê xuta jan cjuar xi chjá cojo ri. Hacuaha tinojetehe rê me xi ha quihndë scaain me cojo cjuavisiajmi rê me ta, tsêhë xi cuatjin meje rê Nina. Venguin camahani chjí rê xi cuatjin ticjan me cojo cjuar ta, xi cuatjin sahmi me ne, tu titsinguetsun me cjuatacun rê xuta xi viseñuju. ¹⁵Nihñi nguyë xi Nina ne, chuya

rê me tsêhë xa xi tinihñi. Xi cuatjin ne, tsajin mé nihñi sava ta, tsêhë xi ha chihin tivicoye rê xuta cjuar xi cjuaquixi. ¹⁶Xi caninguisinjñii ngajñi rê cjuavisiajmi ngarca xi tsajin mé machjirêhë xi visiajmi xuta ta, me xi cuatjin visiajmi ne, quihndë nga nchujun ne, tijima yehe sa cjuatsehen xi tjin rê me. ¹⁷Hacuaha cjuavisiajmi rê me xi cuacun jan ne, tangun cojo hiscan xi hmu, xi quihndë nga nchujun ne, tijima tojo sa. Cuatjin tivatju cha Himeneo cojo cha Fileto ta, ¹⁸tsêhë xi ha cavetjuxin cha tsêhë ndiya rê cjuaquixi. Chja cha ta quixiin xi cuascaya naja hya xi ha caveyan. Hane cojo cjuar vêhë ne, titsinguetsun cha cjuatacun rê ngujo xuta xi macjain rê me Nina. ¹⁹Peru Nina ne, cavejña me ngu cjuatacun xi hatuxa cjuaquixi, xi tsajin yo cuma tsinguetsun rê. Hacuaha jo cjuar rê Nina xi hatuxa cjuaquixi. Ngu ne, chja cuitjin: “Nai naja ne, vëë me jarë xuta xi tsêhë me”; ngu nga ne, chja cuitjin: “Yëjë ni xuta xi chja me xi ladu rê Nai naja me ne, meje rê xi catiyujuxin me tsêhë cjuatsehen.”

²⁰Ndava ngu xuta xi ndaja vatju me ne, jemu cjin xcusun trasti xi tjin. Tjin trasti xi tsêhë oro cojo xi tsêhë quicha. Hacuaha tjin xi tsêhë ya cojo xi tsêhë nihndë. Ngujo trasti jan ne, jemu machjirêhë. Hane ngujo nga ne, chuva machjirêhë. ²¹Cuatjin naja ngayaan xuta ladu rê Cristu ta, jemu tecjanjñi ngayaan. Peru xi cuma yaan xuta xi vengui chjí rê ne, meje rê xi cuiyujuxen yëjë ni cjuatsehen. Xi cuatjin ne, cuma tyjahi cjuatacun naja,

cumachjiréhë rë Nai naja ngayaan, hacuaha tjin ndaja ngayaan xi nihña yëjë ni cjuandaja.

²²Yëjë ni cjuatacun tsehen xi meje rë xuta xi chihndë me ne, ngaye ne, tiyijixin. Tihin tjengui ndiya rë cjuaquixi. Catjë catamacjain ri. Tihin tjengui cjuahmutacun. Tihin tjengui cjuajeya, sacuaha tjin sahmi yëjë ni xuta xi cojo ngu cjuatacun tyjahi fehya rë me Nai naja xi cuisecoo rë me. ²³Hya xi tivinenguise xicjin xuta tsëhë cjuangarca xi venguiin chjï rë ne, xi canihñicuendiin cjuaxi chja me. Tsëhë xi ha hye ta tsëhë cjuavëhë ne, hatuxa cuetjucaa ngu si. ²⁴Hane xuta xi sahmi xa rë Nai naja ne, mijï rë xi sircu me ta meje rë xi ndaja me cojo ngayëjë ni xuta. Meje rë xi quicun cacun me xi cuicuya me xuta. Meje rë xi yehe cacun me. ²⁵Hacuaha xuta xi chuyiin rë me tsëhë cjuaquixi ne, meje rë xi cuma quixi me, peru cojo cjuandaja cojo cjuajeya. Xi cuatjin ne, cuma xi sua Nina cahndé xi cuindeya cjuatacun rë xuta xi cuacun jan, hacuaha xi cuijnercu jain me cjuaxi cjuaquixi. ²⁶Sehe hacuaha sacú nga rë me cjuatacun ndajyihî, hacuaha cuetjutje me tsëhë xitsehen matitjun xi cavindacha rë me. Cavindacha xitsehen xuta jan, xi casahmi me yëjë ni hacutjin xi meje rë xitsehen jan.

Nixtin xi cuijnetaha

3 Catijnercuî cjuaxi vihi: hya xi cuma tiña nixtin xi cjuë ngasunhndë ne, jemu choho cuatju xuta cuma ta, ²tsëhë xi xuta ne, cuitjin sahmi me: meje rë me xi

suvá ni me ndajyihî cuatju me cuma; jercu sahmi me cojo tujún; jemu haxi me ta jercu cuichja me xi ndaja vatju me. Hacuaha jercu sahmi hngacacun me; choho cuichja me tsëhë xicjin me hacuaha choho cuichja me tsëhë Nina. Cuihndiin me tsëhë xutacha rë me. Hisca ngu nacuechji naja suaain me, hisca ngu nacuechji rë Nina suaain me. Cuendaain rë me tsëhë Nina; ³tsajin rë me cjuahmutacun; tsajin rë me cjuayumatacun; cuichja me cjuandesu. Hacuîin cuetjo me yojo rë me; jemu sahmi xcuahya me; chuyiin rë me tsëhë yëjë ni cjuandaja. ⁴Jo xcun jo hntsua me ta, cuiteña xicjin me; jemu tujyë sahmi me; jemu sahmi yehe me yojo rë me. Chuyiin rë me tsëhë Nina ta cjuasua xi tsëhë ngasunhndë ne, vëhë jemu chuya rë me tsëhë. ⁵Hacuaha sahmi me xcusun rë xuta xi macjain jain rë Nina, peru tsitjungui me hacutjin xi cjuaquixi.

Xi caninguisinjñii cojo xuta xi cuacun vë ta, ⁶tsëhë xi ngajñi rë me ne, hinchajñi cha xi vanguisse chuva rë xi cuma cuisehen ndava xuta, hane cuindacha cha yachjin xi ha tsingatihin mandacha. Tsingatihin na mandacha na ta, tsëhë xi jemu va tjin cacun na tsëhë jyé rë na, xi tisahmi na yëjë ni hacutjin xi xahasen rë na meje rë. ⁷Hacuaha yachjin jan ne, jemu vutaya na yëjë ni cjuatacun xatsë, peru hatuxa vijniircu na cjuaxi cjuaquixi. ⁸Ha hye ta hatsëë nixtin ne, jo cha surqui xi hmï Janes cojo Jambres ne, casahmi cha condra xutachanga naja Moisés. Hacuaha ni tjin rë cha ndacha xi cuacun jan ne, sahmi

cha condra cjuua xi cjuuquixi ta, cavetsun cjuatacun rē cha, hacuaha machjiriin cha xi cumacjain rē cha Nina. ⁹Hane hacuiin jemu xcun cuma cjue cha cojo cjuua ndacha rē cha ta, tsēhē xi ngayējē ni xuta ne, cjuahacuenda me xcusun yumahasen xi cun cha, sacuatjin cama tsejen xcusun yumahasen xi cun cha surqui xi cuacun jan hatsēē nixtin.

Pablo ne, tsinguixi me Timoteo

¹⁰Peru ngaye ne, jemu ndaja tichutaye cjuua xi vicuyá cojo xcusun xi sahme cojo cjuatacun xi tjēngē. Hacuaha jemu ndaja hye hacutjin xi fē macjain ná, hacutjin xi jyē cáacun, hacutjin xi hmu cáacun, cojo hacutjin xi ndaja ticaa ná. ¹¹Hacuaha ndaja camachaya ri tsēhē yējē ni cjuañihi xi cavátju camá. Jercu choho cavátju camá ngajan nandya Antioquía cojo Iconio cojo Listra. Peru Nai naja ne, cavaxētje ná me tsēhē yējē ni cjuañihi xi cavátju camá jan. ¹²Hacuaha yējē ni xuta xi meje cjuaharcun me Nina ta tsēhē xi macjain rē me Cristu Jesús ne, hatuxa tjin xi cuatju me cjuañihi. ¹³Peru xuta tsehen cojo xuta ndacha ne, quihndē nga nchujun ne, tichaja sa cjuatacun rē me, xi vindacha me yahnga xuta ne, hacuaha jima ndacha suvā me.

¹⁴Ngaye ne, hacuiin cuejñixin cjuua xi cachutaye, cjuua xi café ma ngu tacuin cojo. Ha hye yo xi cavicuya ri ta, ¹⁵tsēhē xi hisca cjuuquihndi riji ne, cachutaye xujun rē Nina. Hane xujun jan ne, vēhē sua machaya ri xi Nina ne, cuaxētje

naja me, ngayaan xi macjain naja Cristu Jesús. ¹⁶Nina ne, casua me cjuatacun rē me ngujo xuta, sehe xuta jan ne, catsihindu me xujun rē Nina. Vēhē xi xujun jan ne, jemu machjirēhē xi cuicuya naja, xi cuichjataha naja, xi tsinguixi naja, xi cuincha naja ndiya rē cjuuquixi, ¹⁷cojo sa xi ngayaan xuta ladu rē Nina ne, cuechutaha cjuatacun naja xi cuma nihña yējē ni cjuandaja.

4 Tivutsejen naja Nina. Hacuaha tivutsejen naja Cristu Jesús, me xi tsichuva naja ngayējē ni ngayaan xuta, sa xi quicun cuaha ngayaan, o sa xi caveyan. Tsēhē xi cuinduva nga me, hacuaha tsēhē xi cuitexa naja me ne, vēhē xi chjá cojo ri ta ²tinoje cjuua rē Nina cojo xuta. ¿Há chuya rē me? ¿há chuyiin rē me? peru tsimii sahmi rē, tinoje cojo rē me. Hacuaha tinojetehe rē me. Ninguixi me. Ticoye rē me. Peru nijyētacuin cojo rē me. ³Cuatjin nihñi ta, tsēhē xi cuetjucaa nixtin xi xuta ne, ha quihndē chuyiin rē me tsēhē cjuua xi cjuuquixi. Sahmi me hacutjin xi meje rē me, hane cuihndē me tu mé ni cjuua xi cuicuya maestro xi yahnga ta, maestro xi cuacun jan ne, suvā cjuua xi chuya rē xuta ne, vēhē cuicuya me. ⁴Cuatjin xi xuta ne, sahmi ngaxtun me cjuua xi cjuuquixi ne, tu cuentu xi machjiriin ne, vēhē cuetaha rcu me. ⁵Peru ngaye ne, meje rē xi tacun cahndé cjuatacun riji ngajñi rē tu mé ni ngu cjuacjintacun. Hacuaha tehe tacuin tsēhē yējē ni cjuañihi. Tinoje cojo xuta cjuua rē Nina, nihñichihin xá xi casua ri me.

⁶Ngahan ne, chuva sa nixtin xi cjuē ngahan. Ha cama tiña nixtin

xi cueya. ⁷Ndaja casahme xa, casahmechehen xa xi casua ná Nina. Hacuaha ndaja macjain cuaha ná Nina. ⁸Vèhè xi ha tjin ndaja cjuatjo xi sacú ná, tsèhè xi tyjahi cjuatacun naha. Nai naja, me xi tsichuva naja cojo cjuaquixi ne, me vèhè xi sua ná me cjuatjo jan hya xi cuechutaha nixtin. Hacuaha hacuiin tu suva ni ngahan xi sua ná me ta cojo ngayèjè ni xuta xi jemu meje rè me xi cuya nga Nai naja.

Pablo ne, fehya me ngu cjuandaja

⁹Nihñi xati tacuin ndove tjengui ná ta, ¹⁰tsèhè xi cha Demas ne, cavetjuxin cha tsahan, quiji cha ngajan nandya Tesalónica. Cuatjin casahmi cha ta, tsèhè xi hitsè sa chuya rè cha tsèhè xcusun rè ngasunhdè. Cha Crescente ne, quiji cha ladu tsèhè Galacia. Hane cha Tito ne, quiji cha ladu tsèhè Dalmacia. ¹¹Hane suvá ni cha Lucas quitaha cha cojo ná. Noje cojo cha Marcos ne, sehe ndove cojo cha ta, tsèhè xi jemu machjirèhè cha xi cuisecoo ná cha tsèhè xa xi sahme. ¹²Cha Tíquico ne, catsingátju cha ngajan nandya Efeso. ¹³Hya xi cuindove ne, ndovecueje tsjian tsangá naha xi cavejñá ndava cha Carpo, ngajan nandya Troas. Hacuaha cojo xujun naha, hacuaha cojo yèjè ni sa xujun naha ne, ndovecueje.

¹⁴Cha Alejandro chjine quicha ne, jemu choho casahmi cha cojo ná. Peru Nai naja ne, sehe sahmingojo me cojo rè cha, chuva rè jyè xi tjin rè cha. ¹⁵Hane ngaye ne, tjin ri

cuidadu tsèhè cha ta, tsèhè xi jemu casahmi cha condra cjuarè Nina xi canújin.

¹⁶Hya xi tjun tjun casuá cjuaquixi naha xcun xutaxa rè ne, tsajin yo cavisecoo ná. Yèjè ni amigu naha ne, cavetjuxin me tsahan. Hane catitsijyècacun Nina cojo me xi cuacun cavetjuxin tsahan jan. ¹⁷Peru Nina ne, cavisecoo ná me, casua ná me ngahñu, xi cama cachjá cjuarè me cojo yèjè ni xuta xi hacuiin tsèhè nación tsèhè Israel. Hacuaha Nina ne, cavaxètje ná me tsèhè xuta xi meje tsiquehen ná. ¹⁸Hacuaha cuaxètje ná Nai naja tsèhè ngayèjè ni cjuatsehen, sehe cjuahatsja ná me ngajan ngahnga hiscan xi vitexa me. Me vèhè xi hatuxa jyè me, hatuxa hñu me yèjè ni nixtin. Cuatjin jain.

Tsinguijnetaha me cjuarè

¹⁹Cha Aquila cojo chjuun rè cha, na Prisca ne, tehe rè me ngu nina naha. Hacuaha cojo xuta rè cha Onesíforo ne, tehe rè me ngu nina naha. ²⁰Cha Erasto ne, casetaha cha nandya Corinto. Hane cha Trófimo ne, tsèhè xi hmu rè cha ne, cafaña cha ngajan nandya Mileto. ²¹Nihñi xati tacuin, ndove tjengui ná quihndè xi chaja sa chan hnchan. Cha Eubulo ne, cha Pudente ne, cha Lino ne, na Claudia ne, cojo ngayèjè ni xuta xi macjain rè cjuarè Cristu Jesús ne, tsingatju me nina riji.

²²Nai naja yaha ri me. Nina catisua nuju me cjuandaja rè me ngayujun ni.